

01.11.2012.



Općina Goražde jučer je bila domaćin predavanja na temu pisanja projekata i aplikacija za fondove EU.

Europski pokret u BiH implementira projekat „Jačanje kapaciteta lokalnih zajednica za korištenje EU fondova- praktična iskustva iz Češke Republike“ finansiran od strane Češke razvojne agencije preko Ambasade Češke Republike u BiH.

Predrag Praštalo, predsjednik Europskog pokreta u BiH ovom prilikom je istakao: „Naša namjera je da partnerski gradovi dobiju informacije o pisanju aplikacija prema EU institucijama, jer se radi o EU fondovima, ali ove informacije će biti korisne kada su u pitanju i drugi fondovi. Građani BiH i lokalne zajednice udaljeniji od centara Sarajevo, Banja Luka i Mostar imaju vrlo malo pravih informacija o načinu i mogućnostima pristupanjima fondovima EU. BiH kao društvo ima problem da naša država nije podnijela aplikaciju za punopravno članstvo u EU i dok je tako BiH može aplicirati za sredstva iz samo dvije komponente IPA fondova, a kada postanemo kandidat, iskoristavaćemo pet komponenti. Lokalne zajednice time najviše profitiraju i ovim projektom ih želimo spremirati za taj period. Ovo je početak, a projekat će i u budućnosti biti nastavljen ako nađe na podršku međunarodne zajednice.



Predavač na jučerašnjoj radionici je bio Erol Mujanović koji je istakao da je cilj proći kroz način pisanja projekata. „To postaje zanimanje samo za sebe i cilj nam je približiti korisnike tih

fondova načinima apliciranja i podijeliti što više informacija, ukazati na poteškoće i izazove. Na kraju predavanja, učesnici će dobiti informacije o onome što je raspoloživo, načinima apliciranja, kao i mogućnostima saradnje sa zemljama regiona.“

Prisutnima se ispred Općine Goražde obratio pomoćnik načelnika, Sanid Zirak koji je istakao: „Ovo je značajna radionica u funkciji jačanja kapaciteta Općine, nevladinog i biznis sektora po pitanju apsorpcije sredstava iz IPA fondova. Općina Goražde je jedna od šest općina koje učestvuju u projektu. Mi smo i ranije bili sudionici ovakvih i sličnih procesa i mi smo već na tragu izrade nekih projekata iz domena regionalne saradnje. Radionica se održava u šest općina u Bosni i Hercegovini pod pokroviteljstvom Ambasade Češke Republike.“

Prisutnima su se obratili i predstavnik Ambasade Češke Republike u BiH, predstavnik Direkcije za europske integracije BiH, a radionici je prisustvovao veliki broj zainteresovanih predstavnika vladinog, nevladinog i biznis sektora koji će ovom prilikom steći neophodna znanja i iskustva vezana za apliciranje za sredstva iz EU i dugih fondova.

Ispred Udruženja poslodavaca BPK Goražde predavanjima je prisustvovao Adnan Bukva - tehnički sekretar.





Tehnička služba